



Sesida dals

22 da zercladur 2021

Communitgà ils

28 da zercladur 2021

Protocol nr.

577/2021

Incumbensa da la fracziun da la PS

concernent il sustegn e l'integrasiun da la giuventetgna durant la pandemia dal coronavirus (emprim sutsegnader Rettich)

Resposta da la Regenza

Las mesiras per cumbatter il coronavirus han midà l'onn passà il mintgadi da l'entira societad. Las restricziuns da las libertads persunalas e las pussaivladads da participaziun èn ina sfida per tut ils umans en lur situaziun respectiva. Cun ina vasta strategia da test – che ha in character exemplaric en Svizra – s'engascha il chantun activamain, per che l'entira populaziun possia returnar uschè svelt sco pussaivel a la normalitad.

La Regenza è stada conscienta da la situaziun dals uffants e dals giuvenils durant la pandemia dal coronavirus ed als ha pussibilità facilitaziuns, uschenavant ch'il dretg federal e la situaziun epidemiologica han permess quai. Ils uffants e giuvenils fin 16 onns èn stads exceptads da las restricziuns ch'èn vegnidas decretadas en il Grischun per ils 4 da december 2020. Las schluccadas a partir dal mars 2021 han tractà cun gronda prioritad ils basegns dals uffants e dals giuvenils ed han mess il focus sin lur mund da mintgadi, tras quai che las purschidas da sport e da cultura èn vegnidas avertas.

Tegnair avert las scolas per garantir schanzas da furmaziun uschè egualas sco pussaivel e per resguardar ulteriurs aspects socials sco er la promoziun dal svilup è stada ina da las maximas supremas en il Grischun suenter l'emprima unda. La strategia da test dal Grischun ha integrà fitg baud las scolas per pussibilitar ina instrucziun cun uschè paucas restricziuns sco pussaivel. Ultra da purschidas da la cussegliaziun da geniturs, d'educaziun, da professiun, da studi e da carriera, che stattan da princip a disposiziun a tut la populaziun independentamain da la pandemia, han las scolas survegnì sustegn dals uffizis da furmaziun, per che l'incumbensa da furmaziun haja pudì vegnir ademplida malgrà la situaziun pretensiusa. Medemamain ha il Grischun – cumpareglià cun auters chantuns – renconuschì fitg baud las purschidas da la lavur averta cun giuvenils sco instituziuns socialas. Quai ha pussibilità als giuvenils da s'inscuntrar en preschientscha da personas spezialisadas e da passentar temp cuminaivel. Cun organisaziuns da giuvenils han singuls posts da l'administraziun già regularmain in barat prezius, independentamain da la pandemia.

La discussiun davart las consequenzas da la pandemia per uffants e giuvenils, che vegn manada en la publicitad sco er en circuls spezialisads, ha lieu en il Grischun en furma d'in monitoring, tranter auter en la Cumissiun spezialisada per la protecziun d'uffants e per l'agid a la giuventetgna. Malgrà il pitschen dumber da cas tar ils uffizis spezialisads participads ha ella instradà gia la primavaira 2020 mesiras preventivas e rinforzà l'engaschament en la protecziun d'uffants e da giuvenils cunter violenza a chasa. Il tema central dals Dis d'acziun cunter violenza è stà «Violenza a chasa – uffants e giuvenils entamez» (link: ["AVRA ILS EGLS!"](https://www.gr.ch/AVRA_ILS_EGLS!) - Dis d'acziun cuminaivels cunter violenza 2020 (gr.ch)).

Suenter in onn cun la pandemia datti adina dapli indizis che la «crisa da corona ha l'effect d'ina 'lenta focala', perquai ch'ella rinforza tendenzas existentas d'inegualitad e da grevazzas preliminaras. Las circumstanzas da vita specificas (p.ex. la situaziun famigliara, la situaziun d'abitar u la situaziun finanziaria) paran dad esser en quest connex pli relevantas ch'ils facturs sociodemografics sco tals (sco la vegliadetgna u la schlattaina).» (Kessler, C. & Guggenbühl, L. [2021]. Auswirkungen der Corona-Pandemie auf gesundheitsbezogene Belastungen und Ressourcen der Bevölkerung. Ausgewählte Forschungsergebnisse 2020 für die Schweiz. Arbeitspapier 52. Berna e Losanna: Promoziun Sanadad Svizra).

Sin fundament da questas enconuschientschas vegn la Regenza a la conclusiun che las mesiras concretas, concludidas actualmain cun il «Program chantunal per constituer e per sviluppar vinavant la politica d'uffants e da giuvenils tenor l'art. 26 LPUG», mettan gia ils dretgs accents, p.ex. cun projects da pilot per programs preventivs da visitas a chasa, cun rinforzar las pussaivladads simplas per infurmar e per cussegljar uffants e giuvenils, cun realisar las recumandaziuns da la Conferenza da las directuras e dals directurs chantunals dals affars socials (CDAS) e da la Conferenza per la protecziun d'uffants e da creschids (COPUC) per collocar uffants e giuvenils ordaifer la famiglia ubain cun purschidas da prevenziun en cas da process da separaziun cun grondas dispitas, cun promover process da participaziun sin plaun communal sco er cun promover l'interdependenza da persunas spezialisadas e l'amplificaziun da lur savida. Plinavant examinescha la Regenza cuntinuadamain las consequenzas da la pandemia per l'entira populaziun e prenda – tut tenor il svilup da la pandemia – las mesiras necessarias.

Sa basond sin questas explicaziuns propona la Regenza al Cussegl grond da refusar questa incumbensa.



En num da la Regenza

Il president:

Dr. Mario Cavigelli

Il chancelier:

Daniel Spadin